

Na osnovu članova 22. i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), Vlada Kantona Sarajevo, na 183. sjednici održanoj 21. decembra 2006. godine, donijela je

## UREDBU

### O SUBVENCIONIRANJU TROŠKOVA PRIJEVOZA U JAVNOM GRADSKOM SAOBRAĆAJU NA PODRUČJU KANTONA SARAJEVO

#### Član 1. (Osnovna odredba)

Ovom Uredbom se utvrđuju korisnici prava na subvencioniranje troškova prijevoza u javnom gradskom saobraćaju na području Kantona Sarajevo, uvjeti i način ostvarivanja prava, finansiranje, postupak za ostvarivanje prava i izbor vršioca usluga prijevoza.

#### Član 2. (Korisnici prava)

Pravo na subvencioniranje troškova prijevoza u javnom gradskom saobraćaju imaju:

- a) penzioneri koji imaju prebivalište ili boravište na području Kantona Sarajevo,
- b) penzioneri-povratnici na teritoriju bivšeg Grada Sarajeva kojima penziju isplaćuje Federalni zavod za penzijsko i invalidsko osiguranje (Mirovinsko osiguranje),
- c) slijepa lica koja na boljem oku sa korekcijom imaju oštrinu vida manju od 10% (0,10).

#### Član 3. (Pravo)

Licima iz člana 2. tač. a) i b) obezbjeđuje se godišnji ili šestomjesečni kupon za prijevoz javnim gradskim saobraćajem i to:

- a) sa ličnim učešćem,
- b) bez ličnog učešća.

#### Član 4. (Način ostvarivanja prava)

- 1) Lica iz člana 2. tač. a) i b) pravo na subvencioniranje troškova prijevoza ostvaruju na osnovu posljednjeg isplatnog čeka ili rješenja, odnosno uvjerenja nadležnog organa iz kojeg je vidljivo da je to lice ostvarilo pravo na penziju i lične karte.
- 2) Lica iz člana 2. tačka c) to pravo ostvaruju na osnovu spiska ovjerenog od strane Udruženja slijepih i slabovidnih lica Kantona Sarajevo.

#### Član 5. (Obezbjeđenje sredstava)

Ukupan iznos subvencije prijevoza i pojedinačno učešće korisnika prava na subvencioniranje troškova prijevoza u javnom gradskom saobraćaju zavisi od broja korisnika prava i sredstava odobrenih Budžetom Kantona Sarajevo i utvrdit će se posebnim aktima Vlade Kantona Sarajevo.

Član 6.  
(Izbor vršioca usluga prijevoza)

Korisnik prava na subvencioniranje troškova prijevoza ima pravo da pod jednakim uvjetima koristi prijevoz u javnom gradskom saobraćaju kod svih privrednih subjekata koji su registrovani za obavljanje javnog gradskog prijevoza i koji imaju registrovane linije za obavljanje javnog gradskog prijevoza na području Kantona Sarajevo.

Član 7.  
(Postupak ostvarivanja prava)

Postupak ostvarivanja prava na subvencioniranje troškova prijevoza u javnom gradskom saobraćaju, te način uplate sredstava vršiocima usluga prijevoza iz člana 6. ove Uredbe po osnovu subvencije prijevoza za lica iz člana 2. ove Uredbe propisat će se posebnim Uputstvom resornog ministarstva na čijem razdjelu Budžeta su planirana sredstva za namjenu subvencije troškova prijevoza.

Član 8.  
(Ravnopravnost spolova)

Imenice: penzioner, povratnik i korisnik koje su u tekstu upotrijebljene u muškom rodu odnose se na oba spola.

Član 9.  
(Stupanje na snagu)

Ova Uredba stupa na snagu danom objavljivanja u "Službenim novinama Kantona Sarajevo".

---

Broj 02-05-32091-6/06  
21. decembra 2006. godine  
Sarajevo

---

Po ovlaštenju premijera  
Ministar  
**Sulejman Bajrić**, s. r.